



BASES REGULADORAS DA FESTA DO DEPORTE 2019

1.- DEFINIÇÃO DO EVENTO

A Festa do Deporte SCQ nace como unha iniciativa promovida polo Concello de Santiago de Compostela e a participación das diferentes Entidades Deportivas da cidade.

Trátase dun evento deportivo de tipo recreativo e popular que estará aberto á participación de toda a familia e aos centros educativos do noso municipio, con actividades adaptadas ao nivel de todos os participantes mostrando a gran diversidade de opcións que brinda deportivamente Compostela.

2.- DATAS E LUGARES

Despois da experiencia do ano anterior, prográmanse dúas xornadas de actividade, a celebrar inicialmente o domingo 29 e luns 30 de setembro. O horario de actividade para cada unha das xornadas será o seguinte:

- Domingo 29 de setembro: de 11:00 a 14:30 horas
- Luns 30 de setembro: de 10:30 a 14:00 horas.

A Festa do Deporte pretende ser un gran escenario que facilite a máxima participación de todos os axentes implicados, polo que centrará o seu foco nun espazo de libre concorrencia como é o Parque Público de Galeras, xunto con instalacións deportivas tradicionais como as ubicadas no complexo deportivo de Santa Isabel. Cada espazo contará con sedes e zonas adaptadas para realizar as diferentes actividades deportivas, en función da modalidade e da entidade inscrita, buscando en todo momento encaixar do mellor xeito posible as necesidades de cada deporte.

3.- COMISIÓN ORGANIZADORA

Para a organización e xestión da Festa do Deporte, conformarase unha Comisión Organizadora cuxo fin é velar polo bo funcionamento e o interese xeral do evento.

Esta comisión estará presidida pola Concelleira de Deportes e terá como principais cometidos os seguintes:

- Garantir o correcto desenvolvemento do evento.
- Coordinar as necesidades das entidades inscritas e facilitar a súa participación.
- Definir, en colaboración cos clubs, asociacións e federacións galegas, a programación da Festa do Deporte.
- Establecer os mecanismos necesarios para poder atender os requirimentos de infraestrutura e loxística precisos para a posta en funcionamento de cada modalidade deportiva.
- Estructurar o programa do evento segundo o volume de participantes e asistentes.

A Comisión Organizadora terá en todo momento comunicación coas Entidades Deportivas participantes para a debida coordinación nos días previos ao evento (transporte de material, localizacións, acción de montaxe e decoración de espazos, horarios de participación,...). Ademais, reservarase o dereito de modificar, cando se estime necesario, as datas, os horarios e os espazos previstos notificándollo ás asociacións participantes.

O Concello de Santiago asumirá o custo dun seguro de accidentes innominado para todos os participantes e, dotará a Festa do Deporte dun dispositivo sanitario dimensionado a esta proposta, así como, colaborará e supervisará o desenvolvemento das actividades nas sedes deportivas.

Como medio de difusión e promoción da actividade e das entidades participantes, porase en funcionamento a páxina web festadodeporte.santiagodecompostela.gal



Departamento Municipal de Deportes de Santiago



4.- INSCRICIÓN DAS ENTIDADES PARTICIPANTES

As entidades deportivas interesadas en formar parte do programa da Festa do Deporte e participar activamente do evento deberán inscribirse previamente, polo que será necesario que cumprimente o formulario de inscrición e o presenten no Rexistro Municipal. O formulario de inscrición está dispoñible na páxina web do Departamento Municipal de Deportes deportes.santiagodecompostela.gal

A participación na Festa do Deporte está supeditada á correcta inscrición das entidades deportivas e ao seu compromiso de colaboración coa realización do evento.

O prazo oficial de inscrición comeza o 8 de xullo e finalizará o 13 setembro. Crearase unha listaxe ordenada cronoloxicamente segundo o número e data de entrada no Rexistro Municipal, que se terá en conta no caso de que as solicitudes superen o número de espazos/sedes dispoñibles. Se algunha entidade das que teña concedido un espazo desistise da súa solicitude, poderá ser substituída por outra entidade de dita listaxe.

Unha vez inscrita, se a entidade desexa cancelar a súa participación, deberá comunicalo por escrito cunha antelación mínima de DEZ DÍAS hábiles antes do inicio do evento.

Ademais, a aceptación destas bases supón o consentimento á organización, para gravar a participación da entidade inscrita nesta actividade mediante fotografías, vídeo, televisión e outros medios. O Concello de Santiago de Compostela poderá utilizar dito contido en calquera forma de publicidade e promoción.

5.- SEDES DE ACTIVIDADE

Cada Entidade Deportiva participante disporá dun espazo concreto para exhibir o seu deporte, promocionalo e captar novos deportistas. O obxectivo é que poidan aproveitar da mellor maneira posible o seu espazo podendo ofrecer presentacións, exhibicións, charlas informativas, clases, etc. Neste sentido, ao efecto de garantir a correcta coordinación do evento, cada entidade deberá poñer en coñecemento da Comisión Organizadora todas as accións que desexe realizar. Ademais, poderán ceder fotos e vídeos, así como os nomes de usuarios das súas redes sociais, ca finalidade de dinamizar e dar unha maior visibilidade a través das redes sociais tanto ao evento coma as propias entidades participantes.

Para todas aquelas que non poidan estar presentes ou que, por cuestións de loxística, o seu deporte non poida levarse a cabo no ámbito das sedes que conforman á Festa do Deporte, disporán dun espazo común e específico para difundir e/ou entregar información divulgativa propia que lles permita promocionar a súa actividade.

As Entidades Deportivas participantes están obrigadas á realización da montaxe previa, así como a retirar os seus materiais ao finalizar o evento e a deixar os espazos en idénticas condicións ás recibidas no momento do inicio da actividade.

É responsabilidade da entidade garantir que o material a empregar da súa propiedade se atope en correcto estado de uso e de ser necesario, dispoña da homologación oportuna.

6.- SEGUROS E OUTRAS NORMATIVAS

Todas as entidades participantes deberán ter asegurado ao seu persoal contra accidentes, así como ter en regra os trámites de seguros sociais, impostos e demais obrigacións laborais e fiscais, previstas na lexislación vixente, incluídos os aspectos relacionados coa prevención de Riscos Laborais, ademais de ter cuberta a responsabilidade civil que puidese derivarse das



Departamento Municipal de Deportes de Santiago



súas exposicións. A organización deste evento declinará calquera posible reclamación ou incidencia neste sentido.

O persoal técnico presente na Festa do Deporte e vinculado coas entidades participantes, deberá estar en posesión de certificación negativa do rexistro central de delincuentes sexuais, conforme a Lei 26/2015, de 28 de xullo (BOE 29-7-2015).

O incumprimento de calquera das obrigacións por parte das entidades deportivas inscritas dará lugar a que a Comisión Organizadora:

- Solicite o cumprimento do compromiso subscrito pola interesada no momento de presentar a súa solicitude de inscrición.
- No suposto de non atender aos requerimentos, dar de baixa e non aceptar a participación da entidade, se o estima oportuno.

7.- EVENTO

Durante a celebración do evento, en todo o horario de apertura ao público, sempre estará presente algún formador ou adestrador da entidade co fin de garantir o correcto desenvolvemento da actividade.

En todo caso, haberá persoal de atención nas sedes do evento para solucionar calquera tipo de dúbida ou incidente desta proposta deportiva.

As localizacións realizaranse segundo as necesidades de cada actividade e coordinaranse entre a Comisión Organizadora e a asociación interesada. Cada entidade deberá achegar o material que considere necesario para o desenvolvemento da súa acción, podendo trasladar á Comisión Organizadora necesidades puntuais para a súa valoración (transporte, almacenamento...).

Durante a celebración da Festa do Deporte será obrigatorio atender e cumprir as indicacións que se trasladen por parte do persoal da Comisión Organizadora e, en especial, o seguinte:

- Non estará permitida a venda de ningún tipo de produto por parte das Entidades.
- O único son admitido é o dos equipos da megafonía común do evento.
- Seguir as pautas que procedan para as labores de montaxe, estando prohibido perforar, romper ou deteriorar o chan.
- Non está permitido a colocación de elementos publicitarios.

A participación na Festa do Deporte, implica para as entidades deportivas inscritas a aceptación expresa das presentes bases, ademais dos comunicados e/ou boletíns informativos que puidesen ser emitidos para ese efecto polo Concello de Santiago de Compostela. O incumprimento dalgún destes termos implicaría a perda do dereito de participación no Evento.

8.- MODIFICACIÓN DO EVENTO

O Concello de Santiago de Compostela poderá deixar sen efecto ou modificar a data da celebración do evento por causas de forza maior.